

摘藻堂四庫全書薈要

史部

欽定四庫全書薈要卷四千三百十七

史部

南齊書卷五十五

梁

蕭

子

顯

撰

列傳第三十六

孝義

崔懷慎

公孫僧遠

吳欣之

韓係伯

孫淡

華寶

韓靈敏

封延伯

吳達之

王文殊

朱謙之

蕭叡明

樂頤江泌杜栖陸絳

子曰父子之道天性也君臣之義也人之含孝稟義天生所同淳薄因心非俟學至遲遇為用不謝始庶之法驕慢之性多慙水菽之享夫色養盡力行義致身甘心墮畝不求聞達斯即孟氏三樂之辭仲由負米之歎也通乎神明緣感召情澆世薄方表孝慈故非內德者所以寄心懷仁者所以標物矣埋名韞節鮮或昭著紀夫事行以列于篇

崔懷慎清河東武城人也父邪利魯郡太守宋元嘉中
沒虜懷慎與妻房氏篤愛聞父陷沒即日遣妻布衣蔬
食如居喪禮邪利後仕虜中書戒懷慎不許如此懷慎
得書更號泣懷慎從叔模為滎陽太守亦同沒虜模子
雖居處改節而不廢婚宦大明中懷慎宗人冀州刺史
元孫北使虜問之曰崔邪利模竝力屈歸命二家子姪
出處不同義將安在元孫曰王尊驅驥王陽回車欲令
忠孝竝弘臣子兩節太始初淮北陷沒界上流奔者多

有去就懷慎因此入北至桑乾邪利時已卒懷慎絕而後蘇載喪還青州徒跣冰雪土氣寒酷而手足不傷時人以為孝感喪畢以弟在南建元初又逃歸而弟亦已亡懷慎孤貧獨立宗黨哀之日斂給其升米永明中卒公孫僧遠會稽剡人也治父喪至孝事母及伯父甚謹年穀饑貴僧遠省食減食以養母及伯弟亡無以葬身販貼與隣里供斂送之費躬負土手種松柏兄弟未婚嫁乃自賣為之成禮名聞郡縣太祖即位遣兼散騎常

侍虞炎十二部使行天下建元三年表列僧遠等二十三人詔竝表明閭蠲租稅

吳欣之晉陵利城人也宋元嘉末弟尉之為武進縣戍隨王誕起義太祖遣軍主華欽討之吏民皆散尉之獨留見執將死欣之詣欽乞代弟命辭淚哀切兄弟皆見原建元二年有詔蠲表永明初廣陵民章起之二息犯罪爭死太守劉悛表以聞

韓係伯襄陽人也事父母謹孝襄陽土俗隣居種桑樹

於界上為誌係伯以桑枝蔭妨他地遷塚上開數尺隣
畔隨復侵之係伯輒更改種久之隣人慙愧還所侵地
躬往謝之建元三年蠲租稅表門閭以壽終

孫淡太原人也居長沙事母孝母疾不眠食以差為期
母哀之後有疾不使知也豫章王領湘州辟驃騎行參
軍建元三年蠲租稅表門閭卒於家

華寶晉陵無錫人也父豪義熙末戍長安寶年八歲臨
別謂寶曰須我還當為汝上頭長安陷虜豪歿寶年至

七十不婚冠或問之者輒號慟彌日不忍答也同郡薛天生母遭艱菜食天生亦菜食母未免喪而死天生終身不食魚肉與弟有恩義又同郡劉懷循與弟懷則年十歲遭父喪不絮帛不食鹽菜建元三年竝表門閭

韓靈敏會稽剡人也早孤與兄靈珍竝有孝性母尋又亡家貧無以營凶兄弟共種瓜半畝朝採瓜子暮已復生以此遂辦葬事靈珍亡無子妻卓氏守節不嫁慮家人奪其志未嘗告歸靈敏事之如母晉陵吳康之妻趙

氏父亡弟幼值歲饑母老病篤趙詣鄉里自賣言辭哀切鄉里憐之人人分升米相救遂得免及嫁康之少時夫亡家欲更嫁誓死不貳義興蔣雋之妻黃氏夫亡不重嫁逼之欲赴水自殺乃止建元三年詔蠲租賦表門閭永明元年會稽永興吳翼之母丁氏少喪夫性仁愛遭年荒分衣食以貽里中饑餓者隣里求借未嘗違同里陳穰父母死孤單無親戚丁氏收養之及長為營婚娶又同里王禮妻徐氏荒年客死山陰丁為買棺器自

往斂葬元徽末大雪商旅斷行村里比屋饑餓丁自出
鹽米計口分賦同里左僑家露四喪無以葬丁為辦塚
槨有三調不登者代為輸送丁長子婦王氏守寡執志
不再醮州郡上言詔表門閭蠲租稅又廣陵徐靈禮妻
遭火救兒與兒俱焚死太守劉俊以聞又會稽人陳氏
有三女無男祖父母年八九十老耄無所知父篤癰病
母不安其室值歲饑三女相率於西湖採菱蓴更日至
市貨賣未嘗虧怠鄉里稱為義門多欲取為婦長女自

傷焚獨誓不肯行祖父母尋相繼卒三女自營殯葬為
菴舍墓側又永興概中里王氏女年五歲得毒病兩目
皆盲性至孝年二十父母死臨屍一叫眼皆血出小妹
娥舐其血左目即開時人稱為孝感縣令何曇秀不以
聞又諸暨東滄里屠氏女父失明母痼疾親戚相棄鄉
里不容女移父母遠住紵羅晝樵采夜紡績以供養父
母俱卒親營殯葬負土成墳忽聞空中有聲云汝至性
可重山神欲相驅使汝可為人治病必得大富女謂是

魃魃弗敢從遂得病積時隣舍人有中溪蜮毒者女試治之自覺病便差遂以巫道為人治疾無不愈家產日益鄉里多欲娶之以無兄弟誓守墳墓不肯嫁為山賊劫殺縣令于琳之具言郡太守王敬則不以聞建武三年吳興乘公濟妻姚氏生二男而公濟及兄公願乾伯竝卒各有一子欣之天保姚養育之賣田宅為娶婦自與二男寄止隣家明帝詔為其二子婚表門閭復徭役吳郡范法恂妻褚氏亦勤苦執婦業宋昇明中孫曇瓘

謀反亡命褚謂其子僧簡曰孫越州先姑之姉子與汝
父親則從母兄弟交則義重古人逃竄脫不免汝宜收
之曇瓘尋伏法褚氏令僧簡往斂葬年七十餘永明中
卒僧簡在都聞病馳歸未至而褚已卒將殯舉屍不起
尋而僧簡至焉

封延伯字仲璉渤海人也有學行不與世人交事寡嫂
甚謹州辟主簿舉秀才不就後乃仕垣宗祖為豫州啟
太祖用為長史帶梁郡太守以疾自免僑居東海遂不

至京師三世同財為北州所宗附豫章王辟中兵不就
卒建元三年大使巡行天下義興陳玄子四世一百七
十口同居武陵郡邵榮興文獻叔八世同居東海徐生
之武陵范安祖李聖伯范道根五世同居零陵譚弘寶
衡陽何弘華陽陽黑頭疎從四世同居竝共衣食詔表
門閭蠲稅租又蜀郡王績祖華陽郝道福竝累世同爨
建武三年明帝詔表門閭蠲調役

吳達之義興人也嫂亡無以葬自賣為十夫客以營冢

柳從祖弟敬伯夫妻荒年被畧賣江北達之有田十畝
貸以贖之與之同財共宅郡命為主簿固以讓兄又讓
世業舊田與族弟弟亦不受田遂閑廢建元三年詔表
門閭河南辛普明僑居會稽自少與兄同處一帳兄亡
以帳施靈座夏月多蚊普明不以露寢見色兄將葬隣
人嘉其義賻助甚多普明初受後皆反之贈者甚怪普
明曰本以兄墓不周故不逆來意今何忍亡者餘物以
為家財後遭母喪幾至毀滅揚州刺史豫章王辟為義

曹從事年五十卒又有何伯璵弟幼璵俱厲節操養孤
兄子及長為婚推家業盡與之安貧枯槁誨人不倦鄉
里呼為人師郡守下車莫不修謁永明十一年伯璵卒
幼璵少好佛法翦落長齋持行精苦梁初卒兄弟年並
八十餘

王文殊吳興故鄣人也父沒虜文殊思慕泣血蔬食山
谷三十餘年太守謝朓板為功曹不就永明十一年太
守孔琇之表曰文殊性挺五常心符三教以父沒獯庭

抱終身之痛專席恒居銜罔極之卹服紵縞以經年餌
蔬菽以俟命婚義滅於天情官序空於素抱儻降甄異
之恩榜其閭里鬱林詔榜門改所居為孝行里

朱謙之字處光吳郡錢唐人也父昭之以學解稱於鄉
里謙之年數歲所生母亡昭之假葬田側為族人朱幼
方燎火所焚同產姊密語之謙之雖小便哀戚如持喪
年長不婚娶永明中手刃殺幼方詣獄自繫縣令申靈
勗表上別駕孔稚珪兼記室劉璉司徒左西掾張融牋

與刺史豫章王曰禮開報仇之典以申孝義之情法斷
相殺之條以表權時之制謙之揮刃酬冤既申私禮繫
頸就死又明公法今仍殺之則成當世罪人宥而活之
即為盛朝孝子殺一罪人未足弘憲活一孝子實廣風
德張緒陸澄是其鄉舊應具來由融等與謙之竝不相
識區區短見深有恨然豫章王言之世祖時吳郡太守
王慈太常張緒尚書陸澄竝表論其事世祖嘉其義慮
相復報乃遣謙之隨曹虎西行將發幼方子憚於津陽

門伺殺謙之謙之之兄選之又刺殺惲有司以聞世祖
曰此皆是義事不可問悉赦之吳興沈顗聞而歎曰弟
死於孝兄殉於義孝友之節萃此一門選之字處林有
志節著辯相論幼時顧懼見而異之以女妻焉官至江
夏王參軍

蕭叡明南蘭陵人領軍將軍謏從祖兄弟也父孝孫左
軍叡明初仕員外殿中將軍少有至性奉親謹篤母病
躬禱夕不假寐及亡不勝哀而卒永明五年世祖詔曰

龍驤將軍安西中兵參軍松滋令蕭獻明愛敬淳深色
養盡禮喪過乎哀遂致毀滅雖未達聖教而一至可愍
宜加榮命以矜善人可贈中書郎

樂頤字文德南陽涅陽人世居南郡少而言行和謹仕
為京府參軍父在郢州病亡頤忽思父涕泣因請假還
中路果得父凶問頤便徒跣號咷出陶家後渚遇商人
附載西上水漿不入口數日嘗遇病與母隔壁忍痛不
言齧被至碎恐母之哀已也湘州刺史王僧虔引為主

簿以同僚非人棄官去吏部郎庾杲之嘗往候頤為設
食枯魚菜菹而已杲之曰我不能食此母聞之自出常
膳魚羹數種杲之曰卿過於茅季偉我非郭林宗仕至
郢州治中卒弟預亦孝父臨亡執其手以託郢州行事
王奐預悲感悶絕吐血數升遂發病官至驃騎錄事隆
昌末預謂丹陽尹徐孝嗣曰外傳籍籍似有伊周之事
君蒙武帝殊常之恩荷託付之重恐不得同人此舉人
笑褚公至今齒冷孝嗣心甚納之建武中為永世令民

懷其德卒官有一老嫗行擔斛較若將詣市聞預死棄
擔號泣鴈門解仲恭亦僑居南郡家行敦睦得纖豪財
利輒與兄弟平分母病經時不差入山採藥遇一老父
語之曰得丁公藤病立愈此藤近在前山際高樹垂下
便是也忽然不見仲恭如其言得之治病母即差至今
江陵人猶有識此藤者

江泌字士清濟陽考城人也父亮之員外郎泌少貧晝
日斫爨夜讀書隨月光握卷升屋性行仁義衣弊恐虱

饑死乃復取置衣中數日閒終身無復虱母亡後以生
闕供養遇鮭不忍食食菜不食心以其有生意也歷仕
南中郎行參軍所給募吏去役得時病莫有舍之者吏
扶杖投泌泌親自隱卹吏死泌為買棺無僮役兄弟共
輿埋之領國子助教乘車至染烏頭見老翁步行下
車載之躬自步去世祖以為南康王子琳侍讀建武中
明帝害諸王後泌憂念子琳詣誌公道人問其禍福誌
公覆香鑪灰示之曰都盡無所餘及子琳被害泌往哭

之淚盡繼之以血親視殯葬乃去時廣漢王侍讀嚴桓之亦哭王盡哀泌尋卒泌族人兗州治中泌黃門郎愈子也與泌同名世謂泌為孝江泌以別之

杜栖字孟山吳郡錢唐人徵士京產子也同郡張融與京產相友每相造言論栖常在側融指栖曰昔陳太丘之召元方方之為劣以今方古古人何貴栖出京師從儒士劉瓛受學善清言能彈琴飲酒名儒貴遊多敬待之中書郎周顒與京產書曰賢子學業清標後來之秀

嗟愛之懷豈知云已所謂人之英彥若已有之也刺史
豫章王聞其名辟議曹從事仍轉西曹佐竟陵王子良
數致禮接國子祭酒何遜治禮又重栖以為學士掌婚
冠儀以父老歸養怡情墮畝栖肥白長壯及京產疾旬
日間便皮骨自支京產亡水漿不入口七日晨夕不罷
哭不食鹽菜每營買祭奠身自看視號泣不自持朔望
節歲絕而復續吐血數升時何遜謝朓竝隱東山遺書
敦譬誠以毀滅至祥禪暮夢見其父慟哭而絕初遜兄

默見栖歎曰卿風韻如此雖獲嘉譽不永年矣卒時年三十六當世咸嗟惜焉建武二年剡縣有小兒年八歲與母俱得赤班病母死家人以小兒猶惡不令其知小兒疑之問云母嘗數問我病昨來覺聲羸今不復聞何謂也因自投下牀匍匐至母屍側頓絕而死鄉隣告之縣令宗善才求表廬事竟不行

陸絳字魏卿吳郡人也父閑字遐業有風槩與人交不苟合少為同郡張緒所知仕至揚州別駕明帝崩閑謂

所親曰宮車晏駕百司將聽於冢宰主上地重才弱必不能振難將至矣乃感心疾不復預州事刺史始安王遙光反事敗閑以綱佐被召至杜姥宅尚書令徐孝嗣啟閑不預逆謀未及報徐世標令殺之絳時隨閑抱閑頸乞代死遂并見殺

史臣曰澆風一起人倫毀薄抑引之教徒聞珪璋之璞罕就若令事長移忠儻非行舉薑桂辛酸容遷本質而旌閭變里問餼存牢不過鰥寡齊矜力田等勸其於扶

獎名教未為多也

贊曰孝為行首義實因心白華秉節寒木齊心

南齊書卷五十五

欽定四庫全書薈要卷四千三百十八

史部

南齊書卷五十六

梁

蕭

子

顯

撰

列傳第三十七

倖臣

紀僧真

劉係宗

茹法亮

呂文顯

呂文度

有天象必有人事焉倖臣一星列於帝座經禮立教亦

著近臣之服親倖之義其來已久爰自哀周侯伯專命
桓文霸主至於戰國寵用近習不乏於時矣漢文幸鄧
通雖錢遍天下位止郎中孝武韓嫣霍去病遂至侍中
大司馬迄於魏晉世任權重才位稍爽而信倖唯均中
書之職舊掌機務漢元以令僕用事魏明以監令專權
及在中朝猶為重寄陳淮歸任上司荀勗恨於失職晉
令舍人位居九品江左置通事郎管司詔誥其後郎還
為侍郎而舍人亦稱通事元帝用琅邪劉超以謹慎居

職宋文世秋當周糾竝出寒門孝武以來士庶雜選如東海鮑照以才學知名又用魯郡巢尚之江夏王義恭以為非選帝遣尚書二十餘牒宣敕論辯義恭乃歎曰人主誠知人及明帝世胡毋顥阮佃夫之徒專為佞倖矣齊初亦用久勞及以親信關讞表啟發署詔敕頗涉辭翰者亦為詔文侍郎之局復見侵矣建武世詔命殆不關中書專出舍人省內舍人四人所置四省其下有主書令史舊用武官宋改文吏人數無員莫非左右要

密天下文簿板籍入副其省萬機嚴秘有如尚書外司
領武官有制局監領器仗兵役亦用寒人被恩幸者今
立偉臣篇以繼前史之末云

紀僧真丹陽建康人也少隨逐征西將軍蕭思話及子
惠開皆被賞遇惠開性苛僧真以微過見罰既而委任
如舊及罷益州還都不得志僧真事之愈謹惠開臨終
歎曰紀僧真方當富貴我不見也乃以僧真託劉秉周
顓初惠開在益州土反被圍危急有道人謂之曰城圍

尋解檀越貴門後方大興無憂外賊也惠開密謂僧真
曰我子弟見在者竝無異才政是蕭道成耳僧真憶其
言乃請事太祖隨從在淮陰以閑書題令答遠近書疏
自寒官歷至太祖冠軍府參軍主簿僧真夢蒿艾生滿
江驚而白之太祖曰詩人採蕭蕭即艾也蕭生斷流卿
勿廣言其見親如此元徽初從太祖頓新亭拒桂陽賊
蕭惠朗突入東門僧真與左右共拒戰賊退太祖命僧
真領親兵遊羅城中事寧除南臺御史太祖領軍功曹

上將廢立謀之袁粲褚淵僧真啟上曰今朝廷猖狂人不自保天下之望不在袁褚明公豈得默已坐受夷滅存亡之機仰希熟慮太祖納之太祖欲度廣陵起兵僧真又啟曰主上雖復狂釁虐加萬民而累世皇基猶固盤石今百口北度何必得俱縱得廣陵城天子居深宮施號令目明公為逆何以避此如其不勝則應北走胡中竊謂此非萬全策也上曰卿顧家豈能逐我行耶僧真頓首稱無貳昇明元年除員外郎帶東武城令尋除

給事中邵陵王參軍太祖坐東府高樓望石頭城僧真
在側上曰諸將勸我誅袁劉我意不欲便爾及沈攸之
事起從太祖入朝堂石頭反夜太祖遣衆軍掩討宮城
中望石頭火光及叫聲甚盛人懷不測僧真謂衆曰叫
聲不絕是必官軍所攻火光起者賊不容自燒其城此
必官軍勝也尋而啟石頭平上出頓新亭使僧真領千
人在帳內初上在領軍府令僧真學上手迹下名至是
報答書疏皆付僧真上觀之笑曰我亦不復能別也初

上在淮陰治城得古錫鐵大數尺下有篆文莫能識者
僧真曰何須辯此文字此自久遠之物九錫之徵也太
祖曰卿勿妄言及上將拜齊公已尅日有楊祖之謀於
臨軒作難僧真更請上選吉辰尋而祖之事覺上曰無
卿言亦當致小狼狽此亦何異呼沱之水轉齊國中書
舍人建元初帶東燕令封新陽縣男三百戶轉羽林監
加建威將軍遷尚書主客郎太尉中兵參軍令如故復
以本官兼中書舍人太祖疾甚令僧真典遺詔永明元

年丁父喪起為建威將軍尋除南泰山太守又為舍人
本官如故領諸王第事僧真容貌言吐雅有士風世祖
嘗目送之笑曰人何必計門戶紀僧真常貴人所不及
諸權要中最被盼遇除越騎校尉餘官如故出為建武
將軍建康令還除左右郎將泰山太守加先驅使尋除
前軍將軍遭母喪開冢得五色兩頭蛇世祖崩僧真號
泣思慕明帝以僧真歷朝驅使建武元年除游擊將軍
兼司農待之如舊欲令僧真治郡僧真啟進其弟僧猛

為鎮蠻護軍晉熙太守永泰元年除司農卿明帝崩掌
山陵事出為廬陵長史年五十五卒宋世道人楊法持
與太祖有舊元徽末宣傳密謀昇明中以為僧正建元
初罷道為寧朔將軍封州陵縣男三百戶二年虜圍朐
山遣法持為軍主領支軍救援永明四年坐役使將客
奪其鮭稟削封卒

劉係宗丹陽人也少便書畫為宋竟陵王誕子景粹侍
書誕舉兵廣陵城內皆死敕沈慶之赦係宗以為東宮

侍書泰始中為主書以寒官累遷至勲品元徽初為奉
朝請兼中書通事舍人員外郎封始興南亭侯食邑三
百七十戶帶秣陵令太祖廢蒼梧明旦呼正直舍人虞
整醉不能起係宗歡喜奉命太祖曰今天地重開是卿
盡力之日使寫諸處分敕令及四方書疏使主書十人
書吏二十人配之事皆稱旨除羽林監轉步兵校尉仍
除龍驤將軍出為海鹽令太祖即位除龍驤將軍建康
令永明元年除寧朔將軍令如故尋轉右軍將軍淮陵

太守兼中書通事舍人母喪自解起為寧朔將軍復本
職四年白賊唐寓之起宿衛兵東討遣係宗隨軍慰勞
遍至遭賊郡縣百姓被驅逼者悉無所問還復民伍係
宗還上曰此段有征無戰以時平蕩百姓安帖甚快也
賜係宗錢帛上欲修治白下城難於動役係宗啟適役
在東民丁隨寓之為逆者上從之後車駕講武上履行
白下城曰劉係宗為國家得此一城永明中虜使書常
令係宗題答秘書書局皆隸之再為少府遷游擊將軍

魯郡太守鬱林即位除驍騎將軍仍除寧朔將軍宣城
太守係宗久在朝省閑於職事明帝曰學士不堪治國
唯大讀書耳一劉係宗足持如此輩五百人其重吏事
如此建武二年卒官年七十七

茹法亮吳興武康人也宋大明中出身為小史歷齋幹
扶持孝武末年作酒法鞭罰過度校獵江右還白衣左
右百八十人皆面首富室從至南州得鞭者過半法亮
憂懼因緣啟出家得為道人明帝初罷道結事阮佃夫

用為兗州刺史孟吹陽典籤累至太祖冠軍府行參軍
元徽初除殿中將軍為晉熙王郢州典籤除長兼殿中
御史世祖鎮盆城須舊驅使人法亮求留為上江州典
籤除南臺御史帶松滋令法亮便辟解事善於承奉稍
見委信從還石頭建元初度東宮主書除奉朝請補東
宮通事舍人世祖即位仍為中書通事舍人除員外郎
帶南濟陰太守永明元年除龍驤將軍明年詔曰茹法
亮近在盆城頻使銜命內宣朝旨外慰三軍義勇齊奮

人百其氣險阻艱難心力俱盡宜沾茅土以甄忠績封
望蔡縣男食邑三百戶轉給事中羽林監七年除臨淮
太守轉竟陵王司徒中兵參軍巴東王子響於荊州殺
僚佐上遣軍西上使法亮宣旨慰勞安撫子響法亮至
江津子響呼法亮法亮疑畏不肯往又求見傳詔法亮
又不遣故子響怒遣兵破尹畧軍事平法亮至江陵刑
賞處分皆稱敕斷決軍還上悔誅子響法亮被責少時
親任如舊鬱林即位除步兵校尉延興元年為前軍將

軍延昌殿為世祖陰室藏諸御服二少帝竝居西殿高
宗即位住東齋開陰室出世祖白紗帽防身刀法亮獻
欵流涕除遊擊將軍建武舊人鮮有存者法亮以主署
文事故不見疑位任如故永泰元年王敬則事平法亮
復受敕宣慰出法亮為大司農中書勢利之職法亮不
樂去固辭不受既而代人已至法亮垂涕而出年六十
四卒官

呂文顯臨海人也初為宋孝武齋幹直長昇明初為太

祖錄尚書省事累位至殿中侍御史羽林監帶蘭陵丞
令龍驤將軍秣陵令封劉陽縣男永明元年除寧朔將
軍中書通事舍人本官如故文顯治事以刻覈被知三
年帶南清河太守與茹法亮等迭出入為舍人竝見親
倖四方餉遺歲各數百萬竝造大宅聚山開池五年為
建康令轉長水校尉歷帶南泰山南譙太守尋為司徒
中兵參軍淮南太守直舍人省累遷左中郎將南東莞
太守右軍將軍高宗輔政以文顯守少府見任使歷建

武永元之世尚書右丞少府卿卒

呂文度會稽人宋世為細作金銀庫吏竹局匠元徽中為射雉典事隨監莫修宗上郢世祖鎮盆城拒沈攸之文度仍留伏事知軍隊雜役以此見親從還都為石頭城監仍度東宮世祖即位為制局監位至員外郎帶南濮陽太守殿內軍隊及發遣外鎮人悉關之甚有要勢故世傳越州嘗缺上覓一直事人往越州文度啟其所知費延宗合旨上即以為刺史永明中敕親近不得輒

有申薦人士免官寒人鞭一百上性尊嚴呂文顯嘗在
殿側咳聲高上使茹法亮訓詰之以為不敬故左右畏
威承意非所隸莫敢有言也時茹法亮掌雜驅使簿及
宣通密敕呂文顯掌穀帛事其餘舍人無別任虎賁中
郎將潘敞掌監功作上使造禪靈寺新成車駕臨視甚
悅敞喜要呂文顯私登寺南門樓上知之繫敞上方而
出文顯為南譙郡久之乃復濟陽江瞿曇吳興沈徽孚
等以士流舍人通事而已無權利徽孚粗有筆札建武

中文詔多其辭也官至黃門郎

史臣曰中世已來宰御天下萬機碎密不關外司尚書
八座五曹各有恒任係以九卿六府事存副職咸皆冠
冕搢紳任踈人貴伏奏之務既寢趨走之勞亦息闕宣
所寄屬當有歸通驛內外切自音旨若夫環纓斂笏俯
仰晨昏瞻幄座而竦躬陪蘭檻而高眄探求恩色習覩
威顏遷蘭變鮑久而彌信因城社之固執開壅之機長
主君世振裘持領賞罰事殷能不踰漏宮省咳唾義必

先知故能窺盈縮於望景獲驪珠於龍睡坐歸聲勢臥
震都鄙賄賂日積苞苴歲通富擬公侯威行州郡制局
小司專典兵力雲陞天居旦設蘭錡羽林精卒重屯廣
衛至於元戎啟轍武侯還麾遮迺清道神行案轡督察
來往馳騫輦轂驅役分部親承几案領護所攝示總成
規若徵兵動衆大興民役行留之儀請託在手斷割牢
稟賣弄文符捕叛追亡長戍遠謫軍有千齡之壽室無
百年之鬼害政傷民於此為蠹況乎主幼時昏其為讒

慝亦何可勝紀也

贊曰恩澤而侯親倖為舊使煩左右既貴且富

南齊書卷五十六

謹案卷五十四第六頁後一行天府尤貧於昔刊
本尤訛有據監本改

第八頁前八行莫不有師監本及南史作不聞有
佛

第二十二頁前一行會稽孔道徵南史徵作徽
第二十二頁後七行乃往刊本往訛住據監本毛
本及南史改

第二十七頁前七行乖心異旨刊本旨訛言據監

金史口
本改

卷五十五第十頁前四行樂頤南史作樂頤之
卷五十六第四頁後一行得古錫鐵大數尺監本
及南史作得古錫跌九枚

第六頁前三行明旦呼正直舍人虞整醉不能起
刊本旦訛日據監本毛本及南史改

欽定四庫全書

覆校官助教 臣吳省蘭

校對官檢討 臣王福清

謄錄監生 臣楊邦彥

欽定四庫全書薈要

史部

尚書書卷五十九

七至

詳校官內閣侍讀孫球



欽定四庫全書薈要卷四千三百十九

史部

南齊書卷五十七

梁

蕭

子

顯

撰

列傳第三十八

魏虜

魏虜匈奴種也姓托跋氏晉永嘉六年并州刺史劉琨為屠各胡劉聰所攻索頭猗盧遣子曰利孫將兵救琨於太原猗盧入居代郡亦謂鮮卑被髮左衽故呼為索

頭猗盧孫什翼犍字鬱律旃後還陰山為單于領匈奴
諸部泰元元年苻堅遣偽并州刺史苻落伐犍破龍庭
禽犍還長安為立宅教犍書學分其部黨居雲中等四
郡諸部主帥歲終入朝并得見犍差稅諸部以給之堅
敗子珪字涉圭隨舅慕容垂據中山還領其部後稍疆
盛隆安元年珪破慕容寶於中山遂有并州僭稱魏年
號天賜追諡犍烈祖文平皇帝珪死諡道武皇帝子木
末立年號太常死諡明元皇帝子燾字佛狸代立年號

太平真君宋元嘉中偽太子晃與大臣崔氏寇氏不睦
崔寇譖之玄高道人有道術晃使祈福七日七夜佛狸
夢其祖父竝怒手刃向之曰汝何故信讒欲害太子佛
狸驚覺下偽詔曰王者大業纂承為重儲宮嗣紹百王
舊例自今已往事無巨細必經太子然後上聞晃後謀
殺佛狸見殺燾死謚太武皇帝立晃子濬字烏雷直勤
年號和平追謚晃景穆皇帝濬死謚文成皇帝子弘字
萬民立年號天安景和九年偽太子宏生改年為皇興

什翼珪始都平城猶逐水草無城郭木末始土著居處
佛狸破梁州黃龍徙其居民大築郭邑截平城西為宮
城四角起樓女牆門不施屋城又無塹南門外立二土
門內立廟開四門各隨方色凡五廟一世一間瓦屋其
西立太社佛狸所居雲母等三殿又立重屋居其上飲
食厨名阿真厨在西皇后可孫恒出此厨求食初姚興
以塞外虜赫連勃勃為安北將軍領五部胡屯大城姚
泓敗後入長安佛狸攻破勃勃子昌娶勃勃女為皇后

義熙中仇池公楊盛表云索虜勃勃匈奴正脣是也可
孫昔妾媵之殿西鎧仗庫屋四十餘間殿北絲綿布絹
庫土屋一十餘間偽太子宫在城東亦開四門瓦屋四
角起樓妃妾住皆土屋婢使千餘人織綾錦販賣酤酒
養猪羊牧牛馬種菜逐利太官八十餘窖窖四千斛半
穀半米又有懸食瓦屋數十間置尚方作鐵及木其袍
衣使宮內婢為之偽太子別有倉庫其郭城繞宮城南
悉築為坊坊開巷坊大者容四五百家小者六七十家

每南坊搜檢以備奸巧城西南去白登山七里於山邊別立父祖廟城西有祠天壇立四十九木人長丈許白幘練裙馬尾被立壇上常以四月四日殺牛馬祭祀盛陳鹵簿邊壇奔馳奏伎為樂城西三里刻石寫五經及其國記於鄴取石虎文石屋基六十枚皆長丈餘以充用國中呼內左右為直真外左右為烏矮真曹局文書吏為比德真檐衣人為樸大真帶仗人為胡洛真通事人為乞萬真守門人為可薄真偽臺乘驛賤人為拂竹

真諸州乘驛人為咸真殺人者為契害真為主出受辭
人為折潰真貴人作食人為附真三公貴人通謂之羊
真佛狸置三公太宰尚書令僕射侍中與太子共決國
事殿中尚書知殿內兵馬倉庫樂部尚書知伎樂及角
史伍伯駕部尚書知牛馬驢騾南部尚書知南邊州郡
北部尚書知北邊州郡又有俟懃地何比尚書莫提比
刺史郁若比二千石受別官比諸侯諸曹府有倉庫悉
置比官皆使通虜漢語以為傳驛蘭臺置中丞御史知

城內事又置九豆和官宮城三里內民戶籍不屬諸軍
戍者悉屬之其車服有大小輦皆五層下施四輪三二
百人牽之四施絙索備傾倒輶車建龍旗尚黑妃后則
施雜綵幃無幢絡太后出則婦女著鎧騎馬近輦左右
虜主及后妃常行乘銀鏤羊車不施帷幔皆偏坐垂脚
轅中在殿上亦跂據正殿施流蘇帳金博山龍鳳朱漆
畫屏風織成幌坐施氍毹褥前施金香鑪琉璃鉢金椀
盛雜食器設客長盤一尺御饌圓盤廣一丈為四輪車

元會日六七十人牽上殿蜡日逐除歲盡城門磔雄雞
葦索桃梗如漢儀自佛狸至萬民世增雕飾正殿西築
土臺謂之白樓萬民禪位後常遊觀其上臺南又有伺
星樓正殿西又有祠屋琉璃為瓦宮門稍覆以屋猶不
知為重樓竝設削泥采畫金剛力士胡俗尚水又規畫
黑龍相盤繞以為厭勝泰始五年萬民禪位子宏自稱
太上皇宏立號延興元年至六年萬民死諡獻文皇帝
改號為承明元年是歲元徽四年也祖母馮氏黃龍人

助治國事初佛狸母是漢人為木末所殺佛狸以乳母
為太后自此以來太子立輒誅其母一云馮氏本江都
人佛狸元嘉二十七年南侵畧得馮氏濬以為妾獨得
全焉明年丁巳歲改號太和宋明帝末年始與虜和好
元徽昇明之世虜使歲通建元元年偽太和三年也宏
聞太祖受禪其冬發衆遣丹陽王劉昶為太師寇司豫
二州明年詔遣衆軍北討宏遣大將郁豆眷段長命攻
壽陽及鍾離為豫州刺史垣崇祖右將軍周盤龍徐州

刺史崔文仲等所破宏又遣僞南部尚書托跋等向司
州分兵出克青界十萬衆圍朐山戍主玄元度嬰城固
守青冀二州刺史盧紹之遣子奐領兵助之城中無食
紹之出頓州南石頭亭隔海運糧柴供給城內虜圍斷
海道緣岸攻城會潮水大至虜渰溺元度出兵奮擊大
破之臺遣軍主崔靈建楊法持房靈民萬餘人從准入
海船艦至夜各舉兩火虜衆望見謂是南軍大至一時
奔退初元度自云臂上有封侯志宋世以示世祖時世

祖在東宮書與元度曰努力成臂上之相也虜退上議加封爵元度歸功於紹之紹之又讓故竝見寢上乃擢紹之為黃門郎鬱州呼石頭亭為平虜亭紹之字子緒范陽人自云盧諶玄孫宋大明中預攻廣陵勲上紹之拔迹自投上以為州治中受心腹之任官至光祿大夫永明八年卒三年領軍將軍李安民左軍將軍孫文顯與虜軍戰於淮陽大敗之初虜寇至緣淮驅畧江北居民猶懲佛狸時事皆驚走不可禁止乃於梁山置一軍

南置三軍慈姥置一軍洑州置二軍三山置二軍白沙
洲置一軍蔡州置五軍長蘆置三軍菰浦置二軍徐浦
置一軍內外悉班階賞以示威刑偽昌黎王馮莎向司
州荒人桓天生說莎云諸蠻皆響應莎至蠻竟不動莎
大怒於淮邊獵而去及壽春摧敗朐山不拔虜主出定
州大治道路聲欲南行不敢進廼與偽梁郡王計曰兵
出彭泗間無復閩志要當一兩戰得還歸既於淮陽被
破一時奔走青徐間赴義民先是或抄虜運車更相殺

掠往往得南歸者數千家上未遑外畧以虜既摧破且
欲示以威懷遣後軍參軍車僧朗北使虜問僧朗曰齊
輔宋日淺何故便登天位僧朗曰虞夏登庸親當革禪
魏晉匡戰貽厥子孫豈二聖促促於天位兩賢謙虛以
獨善時宜各異豈得一揆苟曰事宜故屈已應物虜又
問齊主悉有何功業僧朗曰主上聖性寬仁天識弘遠
少為宋文皇所器遇入參禁旅泰始之初四方寇叛東
平劉子房張淹北討薛索兒兼掌軍國豫司顧命宋桂

陽建平二王阻兵內侮一麾殄滅蒼梧王反道敗德有
過桀紂遠遵伊霍行廢立之事袁粲劉秉沈攸之同惡
相濟又秉旄仗鉞大定凶黨戮力佐時四十餘載經綸
夷險十五六年此功此德可謂物無異議虜又問南國
無復齊土何故封齊僧朗曰營丘表海實為大國宋朝
光啓土宇謂是呂尚先封今淮海之間自有青齊非無
地也又問蒼梧何故遂加斬戮僧朗曰蒼梧暴虐書契
未聞武王斬紂懸之黃鉞共是所聞何傷於義昇明中

北使殷靈誕苟昭先在虜聞太祖登極靈誕謂虜典客
曰宋魏通好憂患是同宋今滅亡魏不相救何用和親
及虜寇豫州靈誕因請為劉昶司馬不獲僧朗至北虜
置之靈誕下僧朗立席言曰靈誕昔是宋使今成齊民
實希魏主以禮見處靈誕交言遂相忿詈調虜曰使臣
不能立節本朝誠自慚恨劉昶賂客解奉君於會刺殺
僧朗虜即收奉君誅之殯斂僧朗送喪隨靈誕等南歸
厚加贈賻世祖踐阼昭先具以啟聞靈誕下獄死贈僧

朗散騎侍郎永明元年冬遣驍騎將軍劉纘前軍將軍
張謨使虜明年冬虜使李道固報聘世祖於玄武湖水
步軍講武登龍舟引見之自此歲使往來疆場無事三
年初令鄰里黨各置一長五家為鄰五鄰為里五里為
黨四年造戶籍分置州郡雍州涼州秦州沙州涇州華
州岐州河州西華州寧州陝州洛州荊州郢州北豫州
東荊州南豫州西兗州東兗州南徐州東徐州青州齊
州濟州二十五州在河南湘州懷州秦州東雍州肆州

定州瀛州朔州并州冀州幽州平州司州十三州在河
北凡分魏晉舊司豫青兗冀并幽秦雍涼十州地及宋
所失淮北為三十八州矣明年邊人桓天生作亂虜遣
步騎萬餘人助之至比陽為征虜將軍戴僧靜等所破
荒人胡丘生起義懸瓠為虜所擊戰敗南奔偽安南將
軍遼東公平南將軍上谷公又攻舞陰舞陰戍主輔國
將軍殷公愍拒破之六年虜又遣衆助桓天生與輔國
將軍曹虎戰大敗於隔城至七年遣使邢產侯靈紹復

通好先是劉纘再使虜太后馮氏悅而親之馮氏有計畧作皇誥十八篇偽左僕射李思沖稱史臣注解是歲馮氏死八年世祖還隔城所俘獲二千餘人佛狸已來稍僭華典胡風國俗雜相揉亂宏知談義解屬文輕果有遠畧遊河北至比干墓作弔比干文云脫非武發封墓誰因嗚呼介士胡不我臣宏以己巳歲立園丘方澤置三夫人九嬪平城南有干水出定襄堦流入海去城五十里世號為索干都土氣寒凝風砂恒起六月雨雪

議遷都洛京九年遣使李道固蔣少游報使少游有機巧密令觀京師宮殿楷式清河崔元祖啟世祖曰少游臣之外甥特有公輸之思宋世陷虜處以大匠之官今為副使必欲模範宮闕豈可令氈鄉之鄙取象天宮臣謂且畱少游令使主反命世祖以非和通意不許少游安樂人虜宮室制度皆從其出初佛狸討羯胡於長安殺道人且盡及元嘉南寇獲道人以鐵籠盛之後佛狸感惡疾自是敬畏佛教立塔寺浮圖宏父弘禪位後黃

冠素服持戒誦經居石窟寺宏太和三年道人法秀與
荀兒王阿辱珮玉等謀反事覺囚法秀加以籠頭鐵鑕
無故自解脫虜穿其頸骨使呪之曰若復有神當令穿
肉不入遂穿而殉之三日乃死偽咸陽王復欲盡殺道
人太后馮氏不許宏尤精信粗涉義理宮殿內立浮圖
宏既經古洛是歲下偽詔尚書思慎曰夫覆載垂化必
由四氣運其功曦曜望舒亦須五星助其暉仰惟聖母
睿識自天業高曠古將稽詳典範日新皇度不圖罪逆

招禍奄丁窮罰追惟罔極永無逮及思遵先旨勅造明
堂之樣卿所制體合六合事越中古理圓義備可軌之
千載信是應世之材先固之器也羣臣瞻見模樣莫不
僉然欲速造朕以寡昧亦思造盛禮卿可即於今歲停
宮城之作營建此構興皇代之奇制遠成先志近副朕
懷又詔公卿參定刑律又詔罷臈前儺唯年一儺又詔
季冬朝賀典無成文以袴褶事非禮敬之謂若置寒朝
服徒成煩濁自今罷小歲賀歲初一賀又詔王爵非庶

姓所僭伯號是五等常秩烈祖之胄仍本王爵其餘王
皆為公公轉為侯侯即為伯子男如舊雖名易於本而
品不異昔公第一品侯第二品伯第三品子第四品男
第五品十年上遣司徒參軍蕭琛范雲北使宏西郊即
前相天壇處也宏與偽公卿從二十餘騎戎服繞壇宏
一周公卿七匝謂之跼壇明日復戎服登壇祀天宏又
繞三匝公卿七匝謂之繞天以繩相交絡紐木枝張覆
以青繒形制平圓下容百人坐謂之為繖一云百子帳

也於此下宴息次祠廟及布政明堂皆引朝廷使人觀
視每使至宏親相應接申以言義甚重齊人常謂其臣
下曰江南多好臣偽侍臣李元凱對曰江南多好臣歲
一易主江北無好臣而百年一主宏大慙出元凱為雍
州長史俄召復職世祖初治白下謂人曰我欲以此城
為上頓處後於石頭造靈車三千乘欲步道取彭城形
迹頗著先是八年北使顏幼明劉思毅反命偽南部尚
書李思沖曰二國之和義在庇民如聞南朝大造舟車

欲侵淮泗推心相期何應如此幼明曰主上方弘大信
於天下不失臣妾既與輯和何容二三其德疆場之言
差不足信且朝廷若必赫怒使守在外亦不近相淮漬
思沖曰我國之疆經畧淮東何患不蕩海東岳政存於
信誓耳且和好既結豈可復有不信昔華元子反戰伐
之際尚能以誠相告此意良慕也幼明曰卿未有子反
之急詎求登床之請是後宏亦欲南侵徐豫於淮泗間
大積馬芻十一年遣露布并上書稱當南寇世祖發揚

州民丁廣設召募北地人支酉聚數千人於長安城北
西山起義遣使告梁州刺史陰智伯秦州人王度人起
義應酉攻獲偽刺史劉藻秦雍間七州民皆響應衆至
十萬各自保壁望朝廷救其兵宏遣弟偽河南王幹尚
書盧陽烏擊秦雍義軍幹大敗酉迎戰進至咸陽北濁
谷圍偽司空長洛王繆老生合戰又大破之老生走還
長安梁州刺史陰智伯遣軍主席德仁張弘林等數千
人應接酉等進向長安所至皆靡會世祖崩宏聞關中

危急乃稱聞喪退師太和十七年八月使持節安南大將軍都督徐青齊三州諸軍事南中郎將徐州刺史廣陵侯府長史帶淮陽太守鹿樹生移齊兗州府長史府奉被行所尚書符騰詔曰皇師電舉搖旆南指誓清江祲志廓衡靄以去月下旬濟次河洛會前使人邢蠻等至審知彼有大艾以春秋之義聞喪寢伐爰勅有司輟鑾止輶休馬華陽戢戈嵩北便肇經周制光宅中區永皇基於無窮恢盛業乎萬祀宸居重正鴻化增新四海

承休莫不銘慶故以往示如律令并遣使弔國諱遣偽大將楊大眼張聰明等數萬人攻西夏廣等竝見殺隆昌元年遣司徒參軍劉敷車騎參軍沈宏報使至北宏稱字玄覽其夏虜平北將軍魯直清率衆降以為皆洛州軍事領平戎校尉征虜將軍洛州刺史是歲宏徙都洛陽改姓元氏初匈奴女名托跋妻李陵胡俗以母名為姓故虜為李陵之後虜甚諱之有言其是陵後者輒見殺至是乃改姓焉宏聞高宗踐阼非正既新移都兼

欲大示威力是冬自率大衆分寇豫徐司梁四州遣偽
荊州刺史薛真度尚書郝祁阿婆出南陽向沙碣築壘
開溝為南陽太守房伯玉新野太守劉思忌所破建武
二年春高宗遣鎮南將軍王廣之出司州右僕射沈文
季出豫州左衛將軍崔慧景出徐州宏自率衆至壽陽
軍中有黑氍毹行殿容二十人坐輦邊皆三郎曷刺真槩
多白真毼鐵騎為羣前後相接步軍皆烏楯槩綴接以
黑蝦蟆幡牛車及驢駝載軍資妓女三十許萬人不

攻城登八公山賦詩而去別圍鍾離城徐州刺史蕭惠
休輔國將軍申希祖拒守出兵奮擊宏衆敗多赴淮死
乃分軍據邵陽州柵斷水路夾築二城右衛將軍蕭坦
之遣軍主裴叔業攻二城拔之惠休又募人出燒虜攻
城車虜力竭不能剋王奐之誅子肅奔虜宏以為鎮南
將軍南豫州刺史遣肅與劉昶號二十萬衆圍義陽司
州刺史蕭詵拒戰虜築圍壅柵三重燒居民淨盡并力
攻城城中負楯而立王廣之都督救援虜遣三萬餘人

逆攻太子右率蕭季敞於下梁季敞戰不利司州城內
告急王廣之遣軍主黃門侍郎梁王閒道先進與太子
右率蕭詠輔國將軍徐玄慶荊州軍主魯休烈據賢首
山出虜不脩城內見援軍至蕭詵遣長史王伯瑜及軍
主崔恭祖出攻虜柵因風放火梁王等衆軍自外擊之
昶肅棄圍引退追擊破之輔國將軍桓和出西陰平偽
魯郡公郟城戍主帶莫樓偽東海太守江道僧設伏路
側和與合戰大敗之青徐民降者百餘家青冀二州刺

史王洪範遣軍主崔延攻虜紀城竝拔之宏先又遣偽尚書盧陽烏華州刺史韋靈智攻赭陽城北襄城太守成公期拒守虜攻城百餘日設以鉤衝不捨晝夜期所殺傷數千人臺又遣軍主垣歷生蔡道貴救援陽烏等退官軍追擊破之夏虜又攻司州櫟城二戍戍主魏僧岷朱僧起拒敗之偽安南將軍梁州刺史魏郡王元英十萬餘人通斜谷寇南鄭梁州刺史蕭懿遣軍主姜山安趙超宗等數軍萬餘人分據角弩白馬沮水拒戰大

敗英進圍南鄭土山衝車晝夜不息懿率東從兵二千
餘人固守拒戰隨手摧却英攻城自春至夏六十餘日
不下死傷甚衆軍中糧盡擣麴為食畜菜葉直千錢懿
先遣軍主韓嵩等征獠回軍援州城至黃牛川為虜所
破懿遣氐人楊元秀還仇池說氐起兵斷虜運道氐即
舉衆攻破虜歷城罽蘭駱谷仇池平洛蘇勒六成偽尚
書北梁州刺史辛黑未戰死英遣軍副仇池公楊靈珍
據泥公山武興城主楊集始遣弟集朗與歸國氐楊馥

之及義軍主徐曜甫迎戰於黃旦大敗奔歸時梁州土
豪范凝梁季羣於家請英設會伏兵欲殺英事覺英執
季羣殺之凝竄走英退保濁水聞氐衆盛與楊靈珍復
俱退入斜谷會天大雨軍馬含漬截竹煮米於馬上持
炬炊而食英至下辨靈珍弟婆羅阿卜珍反襲擊英衆
散射中英頰僞陵江將軍悅楊生領鐵騎死戰救之得
免梁漢平武都太守杜靈瑗奮武將軍望法愔寧朔將
軍望法泰州治中皇甫耽竝拒虜戰死追贈靈瑗法愔

羽林監法泰積射將軍時偽洛州刺史賈異寇甲口為
上洛太守李靜所破三年虜又攻司州櫟城為戍主魏
僧岷所拒破秋虜遣軍襲漣口東海太守鄭延祉棄西
城走東城猶固守臺遣冠軍將軍兗州刺史徐玄慶救
援虜引退延祉伏罪初偽太后馮氏兄昌黎王馮莎二
女大馮美而有疾為尼小馮為宏皇后生偽太子詢後
大馮疾差宏納為昭儀宏初徙都詢意不樂思歸桑乾
宏制衣冠與之詢竊毀裂解髮為編服左社大馮有寵

日夜讒詢宏出鄴城馬射詢因是欲叛北歸密選宮中御馬三千匹置河陰渚皇后聞之召執詢馳使告宏宏徙詢無鼻城在河橋北二里尋殺之以庶人禮葬立大馮為皇后便立偽太子恪是歲偽太和二十年也偽征北將軍恒州刺史鉅鹿公伏鹿孤賀鹿渾守桑乾宏徙叔平陽王安壽戍懷柵在桑乾西北渾非宏任用中國人與偽定州刺史馮翌公自隣安樂公托跋阿幹兒謀立安壽分據河北期久不遂安壽懼告宏殺渾等數百

人任安壽如故先是偽荊州刺史薛真度尚書郗祁阿
婆為房伯玉所破宏怒以南陽小郡誓取滅之四年自
率軍向雍州宏先至南陽房伯玉嬰城拒守宏徙數萬
騎罩黃繖去城一里遣偽中書舍人公孫雲謂伯玉曰
我今蕩一六合與先行異先行冬去春還不為停久今
誓不有所剋終不還北停此或三五年卿此城是我六
龍之首無容不先攻取遠一年中不過百日近不過一
月非為難殄若不改迷當斬卿首梟之軍門闔城無貳

幸可改禍為福但卿有三罪今令卿知卿先事武帝蒙
在左右不能盡節前主而盡節今主此是一罪前歲遣
偏師薛真度暫來此卿遂破傷此是二罪武帝之肩肱
被誅戮初無報効而反為今主盡節違天害理此是三
罪不可容恕聽卿三思勿令闔城受苦伯玉遣軍副樂
稚柔答曰承欲見攻圍期於必剋卑微常人得抗大威
真可謂獲其死所先蒙武帝採拔賜預左右犬馬知恩
寧容無感但隆昌延興昏悖違常聖明纂業家國不殊

此則進不負心退不愧幽前歲薛真度導誘邊氓遂見
陵突既荷國恩聊爾撲掃回已而言應畧此責宏引軍
向城南寺前頓止從東南角溝橋上過伯玉先遣勇士
數人着班衣虎頭帽從伏竇下忽出宏人馬驚退殺數
人宏呼善射將原靈度射之應弦而倒宏乃過宏時大
舉南寇偽咸陽王元禧彭城王元勰常侍王元嵩寶掌
王元麗廣陵侯元燮都督大將軍劉昶王肅楊大眼奚
康生長孫稚等三十六軍前後相繼衆號百萬其諸王

軍朱色鼓公侯綠色鼓伯子男黑色鼓竝有鼙角吹脣
沸地宏留偽咸陽王禧圍南陽進向新野新野太守劉
思忌亦拒守臺先遣軍主直閣將軍胡松助北襄城太
守成公期守赭陽城軍主鮑舉助西汝南北義陽二郡
太守黃瑤起戍舞陰城宏攻圍新野城戰聞不息遣人
謂城中曰房伯玉已降汝南何獨自取糜碎思忌令人
對曰城中兵食猶多未暇從汝小虜語也雍州刺史曹
虎遣軍至均口不進永泰元年城陷縛思忌問之曰今

欲降未思忌曰寧為南鬼不為北臣乃死贈冠軍將軍
梁州刺史於是沔北大震湖陽戍主蔡道福赭陽城主
成公期及軍主胡松舞陰城主黃瑤起及軍主鮑舉順
陽太守席謙竝棄城走虜追軍獲瑤起王肅募人嚮食
其肉追贈冠軍將軍兗州刺史數日房伯玉以城降伯
玉清河人既降虜以為龍驤將軍伯玉不肯受高宗知
其志月給其子希哲錢五十米二十斛後伯玉就虜求
南邊一郡為馮翊太守生子幼便教其騎馬常欲南歸

永元末希哲入虜伯王大怒曰我力屈至此不能死節猶望汝在本朝以報國恩我若從心亦欲閒關求反汝何為失計遂卒虜中虜得汧北五郡宏自將二十萬騎破太子率崔慧景等於鄧城進至樊城臨汧水而去還洛陽聞太尉陳顯達經畧五郡圍馬圈宏復率大眾南攻破顯達而死喪還未至洛四百餘里稱宏詔徵偽太子恪會魯陽恪至騶以宏偽法服衣之始發喪至洛乃宣布州郡舉哀制服謚孝文皇帝是年王肅為虜制官

品百司皆如中國凡九品品各有二肅初奔虜自說其
家被誅事狀宏為之垂涕以第六妹偽彭城公主妻之
封肅平原郡公為宅舍以香塗壁遂見信用恪立號景
明元年永元二年也豫州刺史裴叔業以壽春降虜先
是偽東徐州刺史沈陵率部曲降陵吳興人初以失志
奔虜大見任用宏既死故南歸頻授徐越二州刺史時
王肅為征南將軍豫州都督朝廷既新失大鎮荒人往
來詐云肅欲歸國少帝詔以肅為使持節侍中都督豫

徐司三州右將軍豫州刺史西豐公邑二千戶虜既得淮南其夏遣偽冠軍將軍南豫州刺史席法友攻北新蔡安豐二郡太守胡景畧於建安城死者萬餘人百餘日朝廷無救城陷虜執景畧以歸其冬虜又遣將桓道福攻隨郡太守崔士招破之後偽咸陽王禧以恪年少與氏楊集始楊靈祐乞佛馬居及虜大將支虎李伯尚等十餘人請會鴻池陂因恪出北芒獵襲殺之禧猶豫不能發欲更剋日馬居說禧曰殿下若不至北芒便可

回師據洛城閉四門天子聞之必走向河北走桑乾仍
斷河橋為河南天子隔河而治此時不可失也禧又不
從靈祐疑禧反已即馳告恪禧聞事敗欲走渡河而天
雨暗迷道至孝義驛恪已得洛城遣弟廣平王領數百
騎先入宮知無變乃還遣直衛三部兵討禧執殺之虜
法謀反者不得葬棄屍北芒王肅以疾卒

史臣曰齊虜分江南為國歷三代矣華夏分崩舊京幅
裂觀疊阻兵事興東晉三庾藉元舅之盛自許專征元

規臨邾城以覆師稚恭至襄陽而反旆褚裒以徐克勁卒壹沒於鄒魯殷浩驅揚豫之衆大敗於山桑桓溫弱冠雄姿因平蜀之聲勢步入咸關野戰洛鄴既而鮮卑固於負海羗虜割有秦代自為敵國情險勢分宋武乘機故能以次而行誅滅及魏虜兼并河南失境兵馬土地非復曩時宋文雖得之知己未能料敵故師帥無功每戰必殆泰始以邊臣外叛遂亡淮北經畧不振乃議和親太祖創命未及圖遠戎塵先起侵暴方牧淮豫剋

捷青海摧奔以逸待勞坐徵百勝自四州淪沒民戀本
朝國祚惟新歌奉威德提戈荷甲人自為鬪深壘結防
想望南旗天子習知邊事取亂而授兵律若前師指日
遠掃臨彭而背將逗留援接稽統向義之徒傾巢盡室
既失事機朝議北寢偃武修文更思後會永明之世據
已成之策職問往來關禁寧靜疆場之民竝安堵而息
窺覩百姓附農桑而不失業者亦由此而已也夫荆棘
所生用武之弊寇戎一犯傷痍難復豈非此之驗乎建

武初運獫狁雄南逼豫徐彊鎮嬰高城畜士卒不敢與之
校武胡馬蹈藉淮肥而常自戰其地梯衝之害鼓掠所
亡建元以來未之前有兼以穹廬華徙即禮舊都雍司
北部親近許洛平塗數百通驛車軌漢世馳道直抵章
陵鑣案所驚晨往暮返虜懷兼弱之威挾廣地之計彊
兵大衆親自凌殄旂鼓彌年矢石不息朝規懦屈莫能
救禦故南陽覆壘新野頽隍民戶墾田皆為狄保雖分
遣將卒俱出淮南未解沔北之危已深渦陽之敗征賦

內盡民命外殫比屋騷然不聊生矣夫休頽之數誠有
天機得失之迹各歸人事豈不由將率相臨貪功昧賞
勝敗之急不相救護號令不明固中國之所短也

贊曰天立勅胡竊有帝圖即安諸夏建號稱孤齊民急
病井邑焚剗

南齊書卷五十七

南齊書卷五十七考證

魏虜傳永明二年冬虜使李道固報聘○魏紀作李彪
偽安南將軍遼東公平南將軍上谷公又攻舞陰舞陰
戍主輔國將軍殷公懋拒破之○臣祖庚按魏紀云

詔南部尚書公孫文慶上谷公張伏于南討舞陰又
公孫邃傳邃字文慶內都幢將上谷公張儵討蕭蹟
舞陰戍據此則攻舞陰者為南部尚書內都幢將官
名互異戍主為蕭蹟亦有不同又通鑑考異曰伏于

張儵字也

偽咸陽王復欲盡殺道人○臣祖庚按通鑑考異曰咸

陽王元禧時尚幼太和九年始封恐非也

尚書盧陽烏華州刺史韋靈智攻赭陽○臣宗萬按通

鑑考異曰陽烏淵小字靈智珍字也

大馮有寵日夜讒詢○臣祖庚按魏書不載詢非恂

徙詢無鼻城在河橋北二里○臣祖庚按水經注渙水

出河內軹縣原山南流注于河水東有無辟邑謂之

無鼻城此云河橋北未知孰是

南齊書卷五十七考證

欽定四庫全書薈要卷四千三百二十

史部

南齊書卷五十八

梁

蕭

子

顯

撰

列傳第三十九

蠻

東南夷

蠻種類繁多言語不一咸依山谷布荆湘雍郢司等五
州界宋世封西陽蠻梅蟲生為高山侯田治生為威山

侯梅加羊為扞山侯太祖即位有司奏蠻封應在解例
參議以戎夷疏爵理章列代酋豪世襲事炳前葉今宸
歷改物舊冊杓降而梅生等保落奉政事須繩總恩命
升贊有異常品謂宜存名以訓殊俗詔特留以治生為
輔國將軍虎賁中郎轉建寧郡太守將軍侯如故建元
二年虜侵豫司蠻中傳虜已近又聞官盡發民丁南襄
城蠻秦遠以郡縣無備寇潼陽縣令焦文度戰死司州
蠻引虜攻平昌戍戍主苟元賓擊破之秦遠又出破臨

沮百方若殺畧百餘人北上黃蠻文勉德寇汶陽太守
戴元孫孤城力弱慮不自保棄戍歸江陵荊州刺史豫
章王遣中兵參軍劉伍緒領千人討勉德至當陽勉德
請降收其部落使戍汶陽所治城子令保持商旅付其
清通遠遂逃竄汶陽本臨沮西界二百里中水陸迂狹
魚貫而行有數處不通騎而水白田甚肥腴桓溫時割
以為郡西北接梁州新城東北接南襄城南接巴巫二
邊竝山蠻凶盛據險為寇賊宋泰始以來巴建蠻向宗

頭反刺史沈攸之斷其鹽米連討不剋晉天興三年建

平夷王向弘向璩等詣臺求拜除尚書郎張亮議夷貊
不可假以軍號元帝詔特以弘為折衝將軍當平鄉侯
竝親晉王賜以朝服宗頭其後也太祖置巴州以威靜
之其武陵酉溪蠻田思颺寇抄內史王文和討之引軍
深入蠻自後斷其糧豫章王遣中兵參軍莊明五百人
將湘州鎮兵合千人救之思颺與文和拒戰中弩矢死
蠻衆以城降永明初向宗頭與黔陽蠻田豆渠等五千

人為寇巴東太守王圖南遣府司馬劉僧壽等斬山開道攻其砦宗頭夜燒砦退走三年湘州蠻陳雙李答寇掠郡縣刺史呂安國討之不克四年刺史柳世隆督衆征討乃平五年雍司州蠻與虜通助荒人桓天生為亂六年除督護北遂安左郡太守田駟路為試守北遂安左郡太守前寧朔將軍田驢王為試守新平左郡太守皆郢州蠻也九年安隆內史王僧旭發民丁遣寬城戍主萬民和助八百丁村蠻助千二百丁村蠻為蠻所敗

民和被傷失馬及器仗有司奏免官西陽蠻田益宗沈攸之時以功勞得將領遂為臨川王防閣叛投虜虜以為東豫州刺史建武三年虜遣益宗攻司州龍城成為戍主朱僧起所破蠻俗衣布徒跣或椎髻或翦髮兵器以金銀為飾虎皮衣楯便弩射皆暴悍好寇賊焉

東夷高麗國西與魏虜接界宋末高麗王樂浪公高璉為使持節散騎常侍都督營平二州諸軍事車騎大將軍開府儀同三司太祖建元元年進號驃騎大將軍三

年遣使貢獻乘舶汎海使驛常通亦使魏虜然彊盛不
受制虜置諸國使即齊使第一高麗次之永明七年平
南參軍顏幼明宐從僕射劉思敷使虜虜元會與高麗
使相次幼明謂偽主客郎裴叔令曰我等銜命上華來
造卿國所為抗敵在乎一魏自餘外夷理不得望我鑣
塵況東夷小貊臣屬朝廷今日乃敢與我躡踵思敷謂
偽南部尚書李思冲曰我聖朝處魏使未嘗與小國列
卿亦應知思冲曰實如此但主副不得升殿耳此間坐

起甚高足以相報思數曰李道固昔使正以衣冠致隔耳魏國必纓冕而至豈容見黜幼明又謂虜主曰二國相亞唯齊與魏邊境小狄敢躡臣蹤高麗俗服窮袴冠析風一梁謂之幘知讀五經使人在京師中書郎王融戲之曰服之不衷身之災也頭上定是何物答曰此即古弁之遺像也高璉年百餘歲卒隆昌元年以高麗王樂浪公高雲為使持節散騎常侍都督營平二州諸軍事征東大將軍高麗王樂浪公建武三年

此下闕文

報功勞勤實存名烈假行寧朔將軍臣姐瑾等四

人振竭忠効攘除國難志勇果毅等威名將可謂扞城
固蕃社稷論功料勤宜在甄顯今依例輒假行職伏願
恩愍聽除所假寧朔將軍面中王姐瑾歷贊時務武功
竝列今假行冠軍將軍都將軍都漢王建威將軍八中
侯餘古弱冠輔佐忠効夙著今假行寧朔將軍阿錯王
建威將軍餘歷忠款有素文武烈顯今假行龍驤將軍
邁盧王廣武將軍餘固忠効時務光宣國政今假行建
威將軍弗斯侯牟大又表曰臣所遣行建威將軍廣陽

太守兼長史臣高逵行建威將軍朝鮮太守兼司馬臣
楊茂行宣威將軍兼參軍臣會邁等三人志行清亮忠
款夙著往太始中比使宋朝今任臣使冒涉波險尋其
至効宜在進爵謹依先例各假行職且玄澤靈休萬里
所企況親趾天庭乃不蒙賴伏願天監特愍除正達邊
効夙著勤勞公務今假行龍驤將軍帶方太守茂志行
清壹公務不廢今假行建威將軍廣陵太守邁執志周
密屢致勤効今假行廣武將軍清河太守詔可竝賜軍

號除太守為使持節都督百濟諸軍事鎮東大將軍使
兼謁者僕射孫副策命大襲亡祖父牟都為百濟王曰
於戲惟爾世襲忠懃誠著遐表滄路肅澄要貢無替式
循彛典用纂顯命往欽哉其敬膺休業可不慎歟制詔
行都督百濟諸軍事鎮東大將軍百濟王牟大今以大
襲祖父牟都為百濟王即位章綬等五銅虎竹符四王
其拜受不亦休乎是歲魏虜又發騎數十萬攻百濟入
其界牟大遣將沙法名贊首流解禮昆木干那率眾襲

擊虜軍大破之建武二年牟大遣使上表曰臣自昔受
封世被朝榮忝荷節鉞剋攘列辟往姐瑾等竝蒙光除
臣庶咸泰去庚午年獫狁弗悛舉兵深逼臣遣沙法名
等領軍逆討宵襲霆擊匈奴梨張惶崩若海蕩乘奔追斬
僵屍丹野由是摧其銳氣鯨暴韜凶今邦宇謐靜實名
等之畧尋其功勳宜在褒顯今假沙法名行征虜將軍
邁羅王贊首流為行安國將軍辟中王解禮昆為行武
威將軍弗中侯木干那前有軍功又拔臺舫為行廣威

將軍面中侯伏願天恩特愍聽除又表曰臣所遣行龍
驤將軍樂浪太守兼長史臣慕遺行建武將軍城陽太
守兼司馬臣王茂兼參軍行振武將軍朝鮮太守臣張
塞行揚武將軍陳明在官忘私唯公是務見危授命蹈
難弗顧今任臣使冒涉波險盡其至誠實宜進爵各假
行署伏願聖朝特賜除正詔可竝賜軍號

加羅國三韓種也建元元年國王荷知使來獻詔曰量
廣始登遠夷洽化加羅王荷知款關海外奉贄東遐可

授輔國將軍本國王

倭國在帶方東南大海島中漢末以來立女王土俗已見前史建元元年進新除使持節都督倭新羅任那加羅秦韓六國諸軍事安東大將軍倭王武號為鎮東大將軍

南夷林邑國在交州南海行三千里北連九德秦時故林邑縣也漢末稱王晉太康五年始貢獻宋永初元年林邑王范楊邁初產母夢人以金席藉之光色奇麗中

國謂紫磨金夷人謂之楊邁故以為名楊邁死子咄立
慕其父復改名楊邁林邑有金山金汁流出於浦事尼
乾道鑄金銀人像大十圍元嘉二十二年交州刺史檀
和之伐林邑楊邁欲輸金萬斤銀十萬斤銅三十萬斤
還日南地大臣姜僧達諫不聽和之進兵破其北界犬
戎區粟城獲金寶無算毀其金人得黃金數萬斤餘物
稱是和之後病死見胡神為祟孝建二年始以林邑長
史范龍跋為揚武將軍楊邁子孫相傳為王未有位號

夷人范當根純攻奪其國篡立為王永明九年遣使貢
獻金簾等物詔曰林邑蠹爾介在遐外世服王化當根
純乃誠懇款到率其僚職遠績克宣良有可嘉宜沾爵
號以弘休澤可持節都督緣海諸軍事安南將軍林邑
王范楊邁子孫范諸農率種人攻當根純復得本國十
年以諸農為持節都督緣海諸軍事安南將軍林邑王
建武二年進號鎮南將軍永泰元年諸農入朝海中遭
風溺死以其子文款為假節都督緣海軍事安南將軍

林邑王晉建興中日南夷師范稚奴文數商賈見上國
制度教林邑王范逸起城池樓殿王服天冠如佛冠身
被香纓絡國人凶悍習山川善鬪吹海蟲為角人皆裸
露四時暄暖無霜雪貴女賤男謂師君為婆羅門羣從
相姻通婦先遣聘求婿女嫁者加藍衣橫幅合縫如井
闌首戴花寶婆羅門牽婿與婦握手相付祝願吉利居
喪剪髮謂之孝燔屍中野以為葬遠界有靈鷲鳥知人
將死集其家食死人肉盡飛去乃取骨燒灰投海中水

葬人色以黑為美南方諸國皆然區粟城建八尺表日影度南八寸自林邑西南三千餘里至扶南

扶南國在日南之南大海西灣中廣袤三千餘里有大江
水西流入海其先有女人為王名柳葉又有激國人混
填夢神賜弓二張教乘舶入海混填晨起於神廟樹下
得弓即乘舶向扶南柳葉見舶率眾欲禦之混填舉弓
遙射貫船一面通中人柳葉怖遂降混填遂以為妻
惡其裸露形體乃疊布貫其首遂治其國子孫相傳至

王槃況死國人立其大將范師蔓蔓病姊子旃慕立殺
蔓子金生十餘年蔓少子長襲殺旃以刃鏡旃腹曰汝
昔殺我兄今為父兄報汝旃大將范尋又殺長國人立
以為王是吳晉時也晉宋世通職貢宋末扶南王姓僑
陳如名閣耶跋摩遣商貨至廣州天竺道人那伽仙附
載欲歸國遭風至林邑掠其財物皆盡那伽仙間道得
達扶南具說中國有聖主受命永明二年閣耶跋摩遣
天竺道人釋那伽仙上表稱扶南國王臣僑陳如閣耶

跋摩叩頭啟曰天化撫育感動靈祇四氣調適伏願聖
主尊體起居康御皇太子萬福六宮清休諸王妃主內
外朝臣普同和睦隣境士庶萬國歸心五穀豐熟災害
不生土清民泰一切安穩臣及人民國土豐樂四氣調
和道俗濟濟竝蒙陛下光化所被咸荷安泰又曰臣前
遣使齎雜物行廣州貨易天竺道人釋那伽仙於廣州
因附臣舶欲來扶南海中風漂到林邑國王奪臣貨易
并那伽仙私財具陳其從中國來此仰序陛下聖德仁

治詳議風化佛法興顯衆僧殷集法事日盛王威嚴整
朝望國軌慈愍蒼生八方六合莫不歸伏如聽其所說
則化隣諸天非可為喻臣聞之下情踊悅若暫奉見尊
足仰慕慈恩澤流小國天垂所感率土之民竝得皆蒙
恩祐是以臣今遣此道人釋那伽仙為使上表問訊奉
貢微獻呈臣等赤心并別陳下情但所獻輕陋愧懼唯
深伏願天慈曲照鑒其丹款賜不垂責又曰臣有奴名
鳩酬羅委臣逸走別在餘處構結凶逆遂破林邑仍自

立為王永不恭從違恩負義叛主之僭言天不容載伏尋
林邑昔為檀和之所破久已歸化天威所被四海彌伏
而今鳩酬羅守執奴酋自專狠彊且林邑扶南隣界相
接親人是臣奴猶尚逆去朝廷遙遠豈復遵舉此國屬
陛下故謹具上啟伏聞林邑頃年表獻簡絕便欲永隔
朝廷豈有師子坐而安大鼠伏願遣軍將伐酋逆臣亦
自効微誠助朝廷剪撲使邊海諸國一時歸伏陛下若
欲別立餘人為彼王者伏聽勅旨脫未欲灼然興兵伐

林邑者伏願特賜勅在所隨宜以少軍助臣乘天之威
殄滅小賊伐惡從善平蕩之日上表獻金五婆羅今輕
此使送臣丹誠表所陳啟不盡下情謹附那伽仙并其
伴口具啟聞伏願愍所啟并獻金鏤龍王坐像一軀白
檀像一軀牙塔二軀古貝二雙瑠璃蘇鋷二口瑇瑁檳
榔拌一枚那伽仙詣京師言其國俗事摩醯首羅天神
神常降於摩訶山土氣恒暖草木不落其上書曰吉祥
利世間感攝於羣生所以其然者天感化緣明仙山名

摩訶吉樹敷嘉榮摩醯首羅天依此降尊靈國王悉蒙
祐人民皆安寧由斯恩被故是以臣歸情菩薩行忍慈
本迹起凡基一發菩提心二乘非所期歷生積功業六
度行大悲勇猛超劫數財命捨無遺生死不為獸六道
化有緣具脩於十地遺果度人天功業既已定行滿登
正覺萬善智圓脩惠日照塵俗衆生感緣應隨機授法
藥佛化遍十方無不蒙濟擢皇帝聖弘道興隆於三寶
垂心覽萬幾感恩振八表國土及城邑仁風化清皎亦

如釋提洹衆天中最超陛下臨萬民四海共歸心聖慈
流無疆被臣小國深詔報曰具摩醯降靈流施彼土雖
殊俗異化遙深欣讚知鳩酬羅於彼背叛竊據林邑聚
凶肆掠殊宜剪討彼雖介遐陬舊脩蕃貢自宋季多難
海譯致壅皇化惟新習迷未革朕方以文德來遠人未
欲便興干戈王既款列忠到遠請軍威今詔交部隨宜
應接伐叛柔服實惟國典勉立殊效以副所期那伽仙
屢銜邊譯頗悉中土闊狹令其具宣上報以絳紫地黃

碧綠紋綾各五匹扶南人黠惠知巧攻畧傍邑不賓之
民為奴婢貨易金銀綵帛大家男子截錦為橫幅女為
貫頭貧者以布自蔽鍛金環鑽銀食器伐木起屋國王
居重閣以木柵為城海邊生大箬葉長八九尺編其葉
以覆屋人民亦為閣居為船八九丈廣裁六七尺頭尾
似魚國王行乘象婦人亦能乘象鬪雞及狝為樂無牢
獄有訟者則以金指環若雞子投沸湯中令探之又燒
鎖令赤著手上捧行七步有罪者手皆焦爛無罪者不

傷又令沒水直者入即不沈不直者即沉也有甘蔗諸
蔗安石榴及橘多檳榔鳥獸如中國人性善不便戰常
為林邑所侵擊不得與交州通故其使罕至交州斗絕
海島控帶外國故恃險數不賓宋泰始初刺史張牧卒
交趾人李長仁殺牧北來部曲據交州叛數年病死從
弟叔獻嗣事號令未行遣使求刺史宋朝以南海太守
沈煥為交州刺史以叔獻為煥寧遠司馬武平新昌二
郡太守叔獻得朝命人情服從遂發兵守險不納煥煥

停鬱林病卒太祖建元元年仍以叔獻為交州刺史就
安慰之叔獻受命既而斷割外國貢獻寡少世祖欲討
之永明元年以司農劉楷為交州刺史發南康廬陵始
興郡兵征交州叔獻聞之遣使願更申數年獻十二隊
純銀兜鍪及孔雀毳世祖不許叔獻懼為楷所襲間道
自湘川還朝六年以始興太守房法乘代楷法乘至鎮
屬病不理事專好讀書長史伏登之因此擅權改易將
吏不令法乘知錄事房季文白之法乘大怒繫登之於

獄十餘日登之厚賂法乘妹夫崔景叔得出將部曲襲州執法乘謂之曰使君既有疾不宜勞囚之別室法乘無事復就登之求書讀登之曰使君靜處猶恐動疾豈可看書遂不與乃啟法乘心疾動不任視事世祖仍以登之為交州刺史法乘還至嶺而卒法乘清河人昇明中為太祖驃騎中兵至左中郎將性方簡身長八尺三寸行出人上常自俯屈青州刺史明慶符亦長與法乘等朝廷唯此二人

史臣曰書稱蠻夷猾夏蓋總而為言矣至於南夷雜種
分嶼建國四方珍怪莫此為先藏山隱海瓊寶溢目商
舶遠屆委輸南州故交廣富實物積王府充斥之事差
微聲教之道可被若夫用德以懷遠其在此乎

贊曰司雍分壇荆及衡陽參錯州部地有蠻方東夷海
外碣石扶桑南域憬遠極泛溟滄非要乃貢竝亦來王

南齊書卷五十八

欽定四庫全書薈要卷四千三百二十一

史部

南齊書卷五十九

梁

蕭

子

顯

撰

列傳第四十

芮芮虜

河南氏羌

芮芮虜塞外雜胡也編髮左衽晉世什翼珪入塞內後
芮芮逐水草盡有匈奴故庭威服西域土氣早寒所居

為穹廬氈帳刻木記事不識文書馬畜丁肥種衆殷盛
常與魏虜為讐敵宋世其國相希利聖解星筭數術通
胡漢語常言南方當有姓名齊者其人當興昇明二年
太祖輔政遣驍騎將軍王洪軌使芮芮剋期共伐魏虜
建元元年八月芮芮主發三十萬騎南侵去平城七百
里魏虜拒守不敢戰芮芮主於燕然山下縱獵而歸上
初踐阼不遑出師二年三年芮芮主頻遣使貢獻貂皮
雜物與上書欲伐魏虜謂上足下自稱吾獻師子皮袴

褶皮如虎皮色白毛短時有賈胡在蜀見之云此非師
子皮乃扶拔皮也國相邢基祇羅迴奉表曰夫四象稟
政二儀改度而萬物生焉斯蓋虧盈迭襲厯數自然也
昔晉室將終楚桓竊命實賴宋武匡濟之功故能扶衰
定傾休否以泰祚流九葉而國嗣不繼今皇天降禍於
上宋室猜亂於下臣雖荒遠粗閱圖書數難以來星文
改度房心受變虛危納祉宋滅齊昌此其驗也水運邁
屯木德應運子年垂刈劉穆之記崕嶺有不祚之山京

房讖云卯金十六草肅應王歷觀圖緯休徵非一皆云

慶鍾蕭氏代宋者齊會有使力法度及闕此國使反採

訪聖德彌驗天縱之姿故能挾隆皇祚光權定之業翼

亮天功濟悖主之難樹勲京師威振海外仗義之功侔

蹤湯武冥績既著寶命因歸受終之歷歸於有道況夫

帝無常族有德必昌時來之數唯靈是與陛下承乾啟

之機因乘龍之運計應符革祚久已踐極荒裔傾戴莫

不引領設未龍飛不宜沖挹上違天之心下乖黎庶

之望皇為承緒肇自二儀拓土載民地越滄海百代一
族大業天固雖吳漢殊域義同唇齒方欲剋期中原龔
行天罰治兵繕甲俟時大舉振霜戈於并代鳴和鈴於
秦趙掃殄凶醜梟剪元惡然後皇輿遷幸光復中華永
敦隣好倂蹤齊魯使四海有奉蒼生咸賴荒餘歸仰豈
不盛哉永明元年王洪軌還京師經途三萬餘里洪軌
齊郡臨淄人為太祖所親信建武中為青冀二州刺史
私占丁侵虜堺奔敗結氣卒為王求醫工等物世祖

詔報曰知須醫及織成錦工指南車漏刺竝非所愛南方治疾與北土不同織成錦工竝女人不堪涉遠指南車漏刺此雖有其器工匠久不復存不副為悞自芮芮居匈奴故庭十年丁零胡又南攻芮芮得其故地芮芮稍南徙魏虜主元宏以其侵逼遣偽平元王駕鹿渾龍驤將軍楊延數十萬騎伐芮芮大寒雪人馬死者衆先是益州刺史劉俊遣使江景玄使丁零宣國威德道經鄯善于闐鄯善為丁零所破人民散盡于闐尤信佛法

丁零僭稱天子勞接景玄使反命芮芮常由河南道而抵益州

河南匈奴種也漢建武中匈奴婢亡匿在涼州界雜種數千人虜名奴婢為貲一謂之貲虜鮮卑慕容廆庶兄吐谷渾為氐王在益州西北亘數千里其南界龍涸城去成都千餘里大戎有四一在清水川一在赤水一在澆河一在吐屈真川皆子弟所治其王治慕駕川多畜逐水草無城郭後稍為宮屋而民人猶以氈廬百子

帳為行屋地常風寒人行平沙中沙礫飛起行跡皆滅
肥地則有雀鼠同穴生黃紫花瘦地輒有瘴氣使人斲
氣牛馬得之疲汗不能行宋初始受爵命至宋末河南
王吐谷渾拾寅為使持節散騎常侍都督西秦河沙三
州諸軍事車騎大將軍開府儀同三司領護羌校尉西
秦河二州刺史建元元年太祖即本官進號驃騎大將
軍宋世遣武衛將軍王世武使河南是歲隨拾寅使來
獻詔答曰皇帝敬問使持節散騎常侍都督西秦河沙

三州諸軍事車騎大將軍開府儀同三司領護羌校尉
西秦河二州刺史新除驃騎大將軍河南王寶命革授
爰集朕躬猥當大業祇惕魚懷夏中增感王世武至得
元徽五年五月二十一日表聞之濕熱想比平安又卿
乃誠遙著保寧遐疆今詔升徽號以酬忠款遣王世武
銜命拜授又仍使王世武等往芮芮想即資遣使得時
達又奏所上馬等物悉至今往別牒錦絳紫碧綠黃青
等紋各十匹拾寅子易度侯好星文嘗求星書朝議不

給寅卒三年以河南王世子吐谷渾易度侯為使持節
都督西秦河沙三州諸軍事鎮西將軍領護羌校尉西
秦河二州刺史河南王永明三年詔曰易度侯守職西
蕃綏懷允緝忠績兼舉朕有嘉焉可進號車騎大將軍
遣給事中丘冠先使河南道并送芮芮使至六年乃還
得玉長三尺二寸厚一尺一寸易度侯卒八年立其世
子休留茂為使持節督西秦河沙三州諸軍事鎮西將
軍領護羌校尉西秦河二州刺史復遣振武將軍丘冠

先拜授并行弔禮冠先至河南休留茂逼令先拜冠先厲色不肯休留茂耻其國人執冠先於絕巖上推墮深谷而死冠先字道玄吳興人晉吏部郎傑六世孫也上初遣冠先示尚書令王儉儉答上曰此人不啻堪行乃再銜命及死世祖敕其子雄曰卿父受使河南秉忠守死不辱王命我甚賞惜喪屍絕域不可復尋於卿後宦塗無妨甚有高比賜錢十萬布三十匹

氏楊氏與苻氏同出畧陽漢世居仇池地號百頃建安

中有百頃氏王是也晉世有楊茂狻後轉彊盛事見前
史仇池四方壁立自然有樓櫓却敵狀高竝數丈有二
十二道可攀緣而升東西二門盤道可七里上有岡阜
泉源氏於上平地立宮室菓園倉庫無貴賤皆為板屋
土牆所治處名洛谷宋元嘉十九年龍驤將軍裴方明
等伐氏剋仇池後為魏虜所攻失地氏王楊難當從兄
子文德聚衆茹蘆宋世加以爵位文德死從弟僧嗣文
慶傳代之難當族弟廣香先奔虜元徽中為虜攻殺文

慶以為陰平公茹蘆鎮主文慶從弟文弘為白水太守
屯武興朝議以為輔國將軍北秦州刺史武都王仇池
公太祖即位欲綏懷異俗建元元年詔曰昔絕國入贄
美稱前冊殊俗內款聲流往記偽虜茹蘆鎮主陰平郡
公楊廣香怨結同族疊起親黨當宋之世遂舉地降敵
茹蘆失守華陽暫驚近單使先馳宣揚皇威廣香等追
其遠世之誠仰惟新之化內袒請附復地千里氏羌雜
種咸同歸順宜時領納厚加優卹廣香翻迷反正可特

量所授部曲酋豪隨名酬賞以廣香為督沙州諸軍事
平羗校尉沙州刺史尋進號征虜將軍梁州刺史范栢
年被誅其親將李烏奴懼奔叛文弘納之烏奴率亡命
千餘人攻梁州為刺史王玄邈所破復走還氏中荊州
刺史豫章王嶷遣兵討烏奴檄梁州能斬送烏奴首賞
本郡烏奴田宅事業悉賜之與廣香書曰夫廢興無謬
逆順有恒古今共貫賢愚同察梁州刺史范栢年懷扶
詭態首鼠兩端既已被伐盤桓稽命遂潛遣李烏奴叛

楊文弘扇誘邊疆荒雜栢年今已梟禽烏奴頻被摧破
計其餘燼行自消夷今遣參軍行晉壽太守王道寶參
軍事行北巴西新巴二郡太守任湜之行宕渠太守王
安會領銳卒三千遄塗風邁浮川電掩又命輔國將軍
三巴校尉明惠照巴郡太守魯休烈南巴西太守柳弘
稱益州刺史傅琰竝簡徒競驚選甲爭馳雍州水步行
次魏興并山東僑舊會於南鄭或汎舟墊江或飛旂劒
道腹背颯騰表裏震擊文弘容納叛戾專為淵藪外侮

皇威內凌國族君奕世忠款深識理順想即起義應接
大軍共為犄角討滅烏奴剋建忠勤茂立誠節沈攸之
資十年之積權百旅之衆師出境而城潰兵未戰而自
屠朝廷無遺鏃之費士民靡傷痍之弊况叢爾小豎方
之蔑如其取殲殄豈延漏刻忝以寡昧分陝司蕃清氛
蕩穢諒惟任職此府器械山積戈旗林聳士卒剽勁蓄
銳積威除難剿寇豈俟徵集但以剪伐萌蘖弗勞洪斧
撲彼蚊蚋無假多力皇上聖哲應期恩澤廣被罪止首

惡餘無所問賞罰之科具寫如別使道寶步出魏興分
軍沂塾江俱會晉壽太祖以文弘背叛進廣香為持節
都督西秦州刺史廣香子北部鎮將軍郡事炆為征虜
將軍武都太守以難當正屑楊後起為持節寧朔將軍
平羌校尉北秦州刺史武都王鎮武興即文弘從兄子
也三年文弘歸降復以為征西將軍北秦州刺史先是
廣香病死氐衆半奔文弘半詣梁州刺史崔慧景文弘
遣從子後起進據白水白水居晉壽上流西接涪界東

帶益路北連陰平茄蘆為形勝之地晉壽太守楊公則
啓經畧之宜上答曰文弘罪不可恕事中政應且加恩
耳卿若能襲破白水必加厚賞世祖即位進後起號冠
軍將軍永明元年以征虜將軍吳為沙州刺史陰平王
將軍如故二年八座奏後起勤彰款塞忠著邊城進號
征虜將軍四年後起卒詔曰後起奄至殞逝惻愴于懷
綏禦邊服宜詳其選行輔國將軍北秦州刺史武都王
楊集始幹局沈亮乃心忠款必能緝境寧民宣揚聲教

可持節輔國將軍北秦州刺史平羌校尉武都王後起
弟後明為龍驤將軍白水太守集始弟集朗為寧朔將
軍五年有司奏集始驅狐剪棘仰化邊服母以子貴宜
加榮寵除集始母姜氏為太夫人假銀印九年八座奏
楊昺嗣勤西牧馳款內昭宜增戎章用輝遐外進號前
將軍十年集始反率氐蜀雜衆寇漢川梁州刺史陰智
伯遣軍主寧朔將軍桓盧奴梁季羣宋闕王士隆等千
餘人拒之不利退保白馬賊衆萬餘人縱兵火攻其城

柵廬奴拒守死戰智伯又遣軍主陰仲昌等馬步數千人救援至白馬城東干溪橋相去數里集始等悉力攻之官軍內外奮擊集始大敗十八營一時潰走殺獲數千人集始奔入虜界隆昌元年以前將軍楊炅為使持節督沙州諸軍事平西將軍平羌校尉沙州刺史集始入武興以城降虜氏人苻幼孫起義攻之建武二年氏虜寇漢中梁州刺史蕭懿遣前氏王楊後起弟子元秀收合義兵氏衆響應斷虜運道虜亦遣偽南梁州刺史

仇池公楊靈珍據涪山以相拒格元秀病死苻幼孫領其衆高宗詔曰仇池公楊元秀氏王苗胤乃心忠勇醜虜凶逼血誠彌厲宣播朝威招誘戎種萬里齊契響然歸從誠効顯著實有可嘉不幸殞喪悽愴於懷夫死事加恩陽秋明義宜追覃榮典以弘勸獎贈仇池公持歸國氏楊馥之聚義衆屯沮水關城白馬北集始遣弟集朗率兵迎拒州軍於黃豆戰大敗集始走下辯馥之據武興虜軍尋退馥之留弟昌之守武興自引兵據仇池

詔曰氏王楊馥之世纂忠義率厲部曲樹績邊城克殄
姦醜復內稟朝律外撫戎荒欵心式昭朕甚嘉之以為
持節督北秦雍二州諸軍事輔國將軍平羌校尉北秦
州刺史仇池公沙州刺史楊炅進號安西將軍三年炅
死以炅子崇祖為假節督沙州軍事征虜將軍平羌校
尉沙州刺史陰平王四年偽南梁州刺史楊靈珍與二
弟婆羅阿卜珍率部曲三萬餘人舉城歸附送母及子
雙健阿皮於南鄭為質梁州刺史陰廣宗遣中兵參軍

王思考率衆救援為虜所得婆羅阿卜珍戰死靈珍攻
集始於武興殺其二弟集同集衆集始窮急請降以靈
珍為持節督隴右軍事征虜將軍北梁州刺史仇池公
武都王永元二年復以集始為使持節督秦雍二州軍
事輔國將軍平羌校尉北秦州刺史靈珍後為虜所殺
自虜陷仇池以後或得或失宋以仇池為郡故以氏封
焉

宕昌羌種也各有酋豪領部衆汧隴間宋末宕昌王梁

彌機為使持節督河涼二州安西將軍東羌校尉河涼
二州刺史隴西公建元元年太祖進號鎮西將軍又征
虜將軍西涼州刺史羌王像舒彭亦進為使持節平西將
軍後叛降虜永明元年八座奏前使持節都督河涼二
州軍事鎮西將軍東羌校尉河涼二州刺史隴西公宕
昌王梁彌機前使持節平北將軍西涼州刺史羌王像
舒彭並著勤西垂寧安邊境可復先官爵詔又可以隴
右都帥羌王劉洛羊為輔國將軍機卒三年詔曰行宕

昌王梁彌頡忠款內附著績西服宜加爵命式隆蕃屏
可使持節督河涼二州諸軍事安西將軍東羌校尉河
涼二州刺史隴西公宕昌王頡卒六年以行宕昌王梁
彌承為使持節督河涼二州諸軍事安西將軍東羌校
尉河涼二州刺史宕昌王使求軍儀及伎雜書詔報曰
知須軍儀等九種竝非所愛但軍器種甚多致之未易
內伎不堪涉遠祕閣圖書例不外出五經集注論今特
敕賜王各一部俗重虎皮以之送死國中以為貨

史臣曰氏胡獷盛乘運迭起秦趙僭差相係覆滅餘類
蠢蠢被西疆而奄北際芴芴地窮幽都戎馬天隔氏楊
密邇華夷分民接境侵犯漢漾浸逼狼狐壇場之心窺
望威德梁部多難於斯為梗殘羌遺種際運肇昌盡隴
憑河遠通南驛據國稱蕃竝受職命晉氏衰故中朝淪
覆滅餘四夷庶雪戎禍授以兵杖升進軍麾後代因仍
貪廣聲教綏外懷遠先名後實貿易有無世開邊利羽
毛齒草無損於我若夫九種之事有

闕二字

至於此也

贊曰芮芮河南同出胡種稱王僭帝擅彊專統氏羌孽
餘散出河隴來賓往叛放命承宗

南齊書卷五十九

南齊書卷五十九考證

芮芮虜傳○

臣祖庚

按芮芮即柔然杜佑曰柔然後魏

大武以其無知狀類於蟲故改其號曰蠕蠕宋齊謂之芮芮

河南傳又卿乃誠遙著○乃誠南監本作款誠按乃誠六朝人多用之晉書劉琨傳即有懷其乃誠之語聚衆茹蘆○茹南史作葭

茹蘆鎮主文慶○文慶南史作文度

宕昌傳○

臣祖庚

按北史宕昌蓋三苗之胤杜佑曰其

界自仇池以西東西千里席水以南南北八百里地
多山阜

南齊書卷五十九考證

知州 臣祖庚

謹言梁臣蕭子顯齊之宗室仕梁而

修齊史以故事多附會辭有溢美且以時尚瞿曇
黜儒崇釋其是非大謬于聖人昔曾鞏譏其喜自
馳騁刻彫藻績之變尤多而文益下洵非誣也初
江淹已作十志沈約又有紀二十篇子顯別自表
修淹約注紀遂不復存矣當時奉朝請吳均亦嘗
著齊春秋三十篇劉子玄稱其該實而曾鞏目錄
馬端臨經籍考並不及載夫子顯才氣過人以著

作自命然沿襲卑靡故識復猥瑣即如天文但紀災祥州郡不著戶口未免踈漏而祥瑞一志多載圖讖尤為近誣宜乎司馬光謂李延壽書敘事簡徑勝于正史也雖然蕭齊一代君臣行事之得失論議之往復未嘗表見他書即古人著述亦復不傳於世所可考見者惟是編而是編之在今日惟監本若任其魚豕相仍不益將訛以傳訛幾於殘缺無徵哉臣等仰承

詔命博采前議廣集衆思敬謹編校不敢率畧從事爰
攷宋魏二書南北二史資治通鑑暨通典通考諸
書擇其事涉蕭齊精詳切要者或別其是非或訂
其疑似條分目晰附於各卷之末俾覽者有所依
據以仰副

聖天子修明正史之至意云

臣謹識

南齊書卷五十九考證跋語

謹案卷五十七第一頁後七行年號天賜刊本賜
訛瑞據監本及魏書本紀改

第十一頁後三行先固之器也先固疑當作光國
第二十二頁前四行永元二年也刊本元訛明據
監本毛本及裴叔業傳改

第二十三頁前四行遣弟廣平王刊本廣訛度據
監本及魏書改

第二十五頁前五行井邑焚剗各本井訛并今改

卷五十八第一頁後三行舊冊杓降句疑有訛字
第二頁後八行向宗明與黔陽蠻田豆渠等五千
人為寇刊本黔訛黔千訛十據監本毛本改

第三頁前八行村蠻助千二百丁刊本助訛代據
毛本改

第七頁後四行匈梨張惶句疑有訛字

第九頁前三行事尼乾道句疑有訛字

第十頁後三行大海西灣中刊本灣訛蠻據監本

及南史改





覆校官助教 臣吳省蘭

校對官編修 臣閔惇大

謄錄監生 臣徐維

財團法人
佛陀教育基金會
釋淨空 敬題

